

ATIA

“Den 70 aña comercio a cambia hopi, meta a keda similar”

ORANJESTAD – Den celebracion di ATIA su 70 aña, e presidente y e director ta recorda local cu e organisacion a bin ta haci desde 1945 y tambe e meta pa futuro. Plannan den futuro ta pa ATIA keda independiente y pa tripi duna nan opinion y vocifera esaki.

Igmar Reyes ta splica cu retonan di director di ATIA ta ehecuta e strategianan cu tin hunto cu e maneho di ATIA ta wordo poni riba mesa. Esaki a haci ATIA hopi mas fuerte desde 2010, como awo tin un director cu diariamente por ehecuta e trabounan cu mester wordo haci. Antes tabatin un presidente cu mester a haci tur e trabou banda di ta director of doño di su mes un negoshi, pues aworaki tin mas consistencia den e trabounan. Tambe un parti importante ta pa informa miembronan mas posibel, filtra informacion cu ta necesario pa nan. Apart di esaki ta organisa eventonan cu ta aporta na conocimiento di trahado tambe cu ayudo di seminario y conferencianan na prijsnan rasonabel pa no exclui niun hende, segun sr. Reyes.

Entrepreneurship

No ta kere cu tin un modula cla pa indica hende pa ta exitoso di biaha den nan carera como entrepreneur. E ciclonan aki ta relata na “trial and error” pues bo mester siña di bo foutnan lanta para y continua. “Sinembargo nos ta kere cu local cu ATIA ta haciendo ta pone conocimiento nan disponibel pa duna direccion den fayonan innecesario cu por wordo evita. Un aspecto cu por bay tira mas bista riba dje ta promove entrepreneurship bo di hendenan grandi di edad (55+) pasobra nan tin sabiduria y experiencia caba. Tambe e problema cu personanan den e grupo aki tin ta, cu unabes nan perde trabou hopi difi-

cil nan ta haya uno di nobo. “Mirando e hecho cu hopi biaha un persona grandi ta keda largo den cierto posicion nan lo por bay riba nan mes y crea cupo pa e generacion nobo haya chens den compania. Y asina tin diferente motibo cu mi ta opina cu mester cumin-sa promove entrepreneurship bou di hendenan grandi,” sr. Reyes a bisa. Pa hobennan e director di ATIA ta promove bon stage pa e hobennan haya instrumento corecto pa bira exitoso den futuro. Celebrando 70 aña, aworaki Aruba por ta orguyoso cu un asociacion manera ATIA, 70 aña di existencia no ta algo simpel. “Ta spera cu ATIA por sigui crece y bira mas grandi, no ta pornada ATIA ta e unico asociacion internacional cu ta wordo reconoci internacional pa e organizacion laboral internacional y ta spera pa e keda asina y bira mas grandi pa a cambio por trece mas/miho data y cifra,” sr. Reyes a indica.

Historia ATIA

ATIA a lanta na 1945 den un temporada masha peculiar segun e presidente. Net un luna prome cu esey guera a caba den Europa y ainda tabatin guera den pacifico. Un grupo di comerciante local a dicidi di lanta nan mesun asociacion cu antes tabata “Vereniging van Handelaren op Aruba” cu e meta di promove comercio na Aruba y pa haci negoshi na Aruba mas facil, promove e interes di comercio na Aruba entre otro, local cu ta wordo haci ainda pa ATIA, presidente di ATIA Michael Henriquez a splica. Mundo comercial mientrastanto a cambia hopi, por mira e manera di comunicacion come ehempel y tambe manera di pensa. “Mi ta kere cu e problemanan y meta a keda similar den comercio. Constantemente nos ta purba cu gobierno pa haci Aruba atractivo pa haci negoshi y pa tin espacio y empleo na nos isla.”



Rol di ATIA

Na prome luga ta interes di e comerciantenan na Aruba, como tal nos ta trece preocupacion dilanti y purba bin cu alternativa pa soluciona problemanan. ATIA ta participa na diferente ocasion den dialogo social bon prepara. Ta kere cu esaki a engrandece ATIA mirando cu ATIA ta trece hecho nan den rapport na momento di por ehempel un dialogo y tambe tin involucra comerciantenan den e dialogo.

Hopi biaha no ta haya tur local kier despues di un dialogo cual ta comprensibel pero ATIA ta purba semper di trece un balansa den algo cu gobierno ta propone y ta kere cu a logra den diferente caso e ultimo añanan, sr.



Henriquez a splica.

A puntra Sr. Henriquez si awe den 2015 e miembronan di ATIA ta contento cu con Aruba ta y kico nan kier logra pa mañan mirando cu ATIA ta nan representante den dialogonan. “Mi no sa si nan ta contento of no e ta un pregunta dificil pa contesta. Nos ta preocupa pa e situacion financiero cual nos ta vocifera pa basta aña caba.

Nos ta sinti cu tin hopi presion riba comercio pa saca impuesto pa paga gasto mientras cu di otro banda no tin bahamento di gasto cual ta un preocupacion grandi. Cada bes bo wak tin e necesidad pa subi un impuesto sin cu lago otro bin a cambio pa baha e presion. A forma parti di e reforma fiscal unda cu ta

ansioso pa mira e resultado final y si e ta bay ta un balansa pa gobierno y comercio pues un “win win” pa tur hende.”

Siguiente añanan

Pa e proximo añanan e retonan lo keda mescos y mester vigila e gobierno y sigura cu Aruba ta keda competitivo den e region y cu tin caminda pa duna trabou husto y pa haci esaki e sistema y impuestonan mester ta na nan luga.

Finalizando a puntra Sr. Henriquez si mester di leyman pa proteha nos comerciantenan den momentonan dificil e presidente a bisa: “Mi no sa si mester mas ley pasobra tin hopi ley na Aruba y tin hopi ley cu mester wordo renoba. Demasiado ley no ta bay yuda pasobra tin tanto bal tin ley cual no ta wordo reenforza. Mi ta kere cu comercio mester tin menos ley, “free economy” lo laga nos traha, gobierno mester laga comercio haci comercio. Si tin espacio pa haci negoshi tin y vice versa, gobierno no por dicidi unda ta habri of cera un tienda, esey ta e negoshi mes lo determina,” Sr. Henriquez a termina bisando. □